


霍廷軍紀畧



建軍紀念



又
軍紀略卷十一

銅梁陳 昌世五編輯

雲陽劉海鰲曉瀾鑒定

丙寅同治五年

九月鮑公督軍追賊至魯山

時捻匪分兩路東竄者爲任柱賴文光等股西竄者爲張
總愚牛洛紅等股曾文正公於十八日檄令劉公銘傳潘
公鼎新張公樹珊三軍馳勦東路而以霆軍及劉公秉璋
楊公鼎勦劉公松山等軍專辦西路文正之檄未至而鮑

公已於十六日拔隊窮追師抵魯山奏言臣接准湖北撫臣曾國荃函商刻下捻逆大股已羣趨新野鄧州南陽等屬晝夜兼馳囑改由隨棗一路繞出襄樊庶於局勢較緊兼可堵其入楚之路當卽由樊城前進該逆聞風東竄臣仍連日由新野趕至南陽據探大股之賊復由蘭考折回盤踞許州邊馬竄擾襄城葉縣一帶遂於九月十六日由南陽拔隊取道裕州前赴襄葉迎頭截擊十九日至裕州葉縣之間復據探稱該逆又旁遁寶豐郟縣前隊已至魯山境內當卽率隊隨帶乾糧每日趕行九十餘里由魯山

迎剿二十一日午刻行抵魯山而賊又遁往汝州所轄之
臨汝白沙地方去魯山不下二百餘里該逆馬匹甚多飄
忽無定未遇官兵尙敢盤踞一聞官兵將至於百里外先
行遁去臣連日奔馳未遇一賊不勝惶悚慙赧之至現仍
尋蹤跟追務期盡殄逆氛奏入奉

批諭賊既避兵奔竄卽當覘賊所向迎頭兜剿以遏狂氛
著懷遵迭次諭旨妥速籌辦用副委任時山西巡撫趙公
長齡奏請飭令鮑超分撥數營進紮陝州所屬地方攔
頭遏剿以顧晉省邊陲兼保靈閔潼關奉

寄諭張總愚賴文光等各率大股併力西趨恐該逆分犯
靈寶閿鄉逼近潼關全陝亦爲震動關係極爲緊要鮑超
一軍現在魯山應否卽令該提督移紮陝州一帶專顧西
路著曾國藩李鶴年相機調度後又奉

寄諭前諭曾國藩調鮑超防陝州一路未知該提督曾否
與賊相遇如尙在魯山南召正可移師南陽以防浙川一
帶著曾國藩相機調派

十月鮑公追賊至陝州回軍南陽

鮑公之抵魯山也臨汝白沙之賊由宜陽永甯遁走鮑公

卽由汝州洛陽跟追甫抵洛陽而賊已遁往陝州遂派唐
仁廉曾成武兩軍由盧氏小路前進以達靈寶自率各軍
出韓城間道以達陝州均日行百餘里冀收夾擊之效李
公鶴年以狀聞奉

上諭該逆避實擣虛鮑超此番間道出奇當可制勝該撫
卽咨行鮑超妥速進剿並預計該逆必由之路伏兵待之
可期得手鮑公於軍抵汝州時牒報賊情曾文正公批復
云現在無論賊竄何處貴爵軍門總以力剿西路一股爲
主總以本營專人確探爲憑各路地方官探報不足盡信

目前賊勢東西分竄東路任賴較弱西路張逆較強此人
人所共知者並非東路強而西路弱若霆軍舍張逆而尋
任賴則外間必笑其尋弱者開仗則霆軍之名稍損矣貴
爵軍門務宜專心西剿不可另作比較凡賊在豫境河南
南陽兩府陝汝兩州均請跟蹤追剿若賊入秦省則不必
越境剿辦貴軍此次入豫紀律嚴明毫不騷擾各處函牘
無不稱讚此爲可喜惟尙未與賊接仗向來霆營敢戰之
名外間佩服者多責望者尤重務須確探張逆所在痛快
一戰以慰民望若因山路崎嶇轉運艱難糧食不便行走

稍緩則可改勦東股則不可也初一日鮑公抵陝州之章
茂砦楊忠勤劉公秉璋兩軍亦由新鄭汜輦一路行至陝
州之觀音堂賊知追兵將至遂於閿鄉西南之大峪口繞
越潼關以南闌入陝西之商州一帶連日狂奔晝夜不停
沿途拋棄馬匹甚多鮑公以各軍餉項皆未到米糧罄盡
陝閿商雒萬山之中初冬苦寒士卒寒衣未備萬難再進
又訶知賊以陝西無食可覓意欲由荆紫關竄往湖北而
商州與湖北之鄖陽毗連近接南陽之內鄉鎮平等處因
率軍由章茂砦回至南陽一面籌備米糧一面備勦回竄

之賊楊劉兩軍亦由觀音堂回至新鄭時陝撫劉公蓉奏請飭令鮑超親督所部分由商潼前進奉

寄諭鮑超一軍卽著曾國藩催令入關助剿鮑公於軍次河南府奏言逆蹤飄忽與其尾追於後不如迎截於前臣擬率軍折赴南陽相機迎剿前買戰馬千匹已過汴梁日內當可到營就便迅練馬隊賊若窺竄鄖陽則由光化出擊若圖犯豫境則由內鄉斜出擊之惟此次迴環角逐竟未能痛加剿洗實深慚懼現準賊情以度地勢似宜以南陽爲肆應之處當函商兩江督臣曾國藩定奪可否一面

率隊馳赴等語奏入奉

批諭覽奏已悉陝省東西兩路兵力甚單該提督若不兼程往援誠恐腹背受敵蔓延關隴爲患尤深洛陽新鄭一帶既有劉秉璋等軍駐紮防其回竄該提督仍當遵照昨日諭旨趕緊入關助剿迅殄逆氛無負委任趙公長齡亦同時奏請飭鮑超分撥勁旅十餘營星夜前進由陝州直達潼關鮑公與曾文正公等同奉十六日

寄諭鮑超一軍前令由陝州追剿昨據該提督奏移師南陽當經批令趕緊入關若由內鄉浙川以趨荆子關不數

日卽可入陝一與賊遇可以痛加剿洗著曾國藩卽飭該提督酌度地勢賊情何路最爲便捷卽由何路前進總期痛挫兇鋒力保完善毋任遲回觀望致干重咎豫省之宋慶等軍留爲防守隘口之用劉秉璋等軍卽可酌量分撥赴陝與鮑超互爲聲援並著曾國藩李鶴年相機調度不爲遙制文正奏言鮑超奔馳千里未及接仗實深焦憤陝西艱苦已極不特官軍米糧子藥籌運萬難卽該逆志在擄掠恐亦無所得食不久仍將回竄臣已檄飭各軍沿途確探相機迎剿奏入奉十七日

寄諭西路賊股已竄至同朝華陰節經降旨令鮑超入關
未知該提督現抵何處曾國藩以該逆到陝無從覓食數
月後又將回竄不知陝省尙多完善地方若無大枝勁旅
應援恐關內益遭蹂躪爲患滋深著卽嚴催該提督遵照
連日所奉

諭旨取道入關探賊所向痛加勦洗毋再遷延干咎文正
尋因二十二日以前探報稱賊將回竄豫鄂自二十三日
以後探報並無西股回竄之說遂於二十七日檄令霆軍
由鎮平內鄉浙川進荊子關以達商州入秦援勦以霆軍

入秦不特秦省米糧極少卽豫省陝洛一帶糧食亦艱貴
異常因函商豫撫李公鶴年晉撫趙公長齡設法多辦糧
米舟運入渭接濟霆軍又奏言鮑超軍中向少明幹之員
料理米糧等事前在皖南由臣派員辦糧接濟在江西時
各官紳亦竭力助糧毫無缺乏故能專心打仗所向有功
一離江皖至福建者卽有上杭缺糧之譁赴甘肅者又有
金口棄舟之變若入秦以後糧米不繼深恐滋生事端從
前多隆阿楊岳斌諸軍一入秦境勇丁逃回者極多以僧
格林沁之忠勇亦未嘗派兵西追皆因米糧難購之故臣

此次檄鮑超文內有云如實無米可辦到萬分爲難之際
亦可中途折回並許以兵行至西安省城爲止不再西征
仍奏明專剿捻匪不剿回匪等語與之約定臣蓋鑒於金
口之變故特參以活筆預爲維繫軍心之地伏乞

皇上曲賜原諒臣仍一面諄催鮑超西行得尺則尺得寸
則寸總期有益秦疆不生他患

十一月鮑公在南陽整軍援秦

先是曾文正公以剿捻年餘無效引咎自責奏請 飭令
署兩江總督李鴻章出駐徐州與山東巡撫閻敬銘會辦

東路幫辦軍務湖北巡撫曾國荃移駐南陽與河南巡撫
李鶴年會辦西路而自請仍駐周家口居中聯絡嗣李公
視師徐州曾公視師襄陽尋駐黃州文正遂於上月十三
日奏稱病難速痊請

旨另簡大臣接辦軍務於是李公鴻章以 欽差大臣專
辦剿匪事宜奏言

諭旨以西路賊股已至同朝華陰嚴催鮑超取道入關臣
前准鮑超函稱探悉陝地無食賊欲仍竄湖北覓糧過冬
該營因餉解不到兵勇凍餓堪虞仍率隊由洛汝回紮南

陽昨據曾國藩咨稱據南召縣稟報賊欲竄鄖陽過冬老
湘營劉松山稟報入秦之賊已回竄盧氏霆軍仍應在豫
鄂防剿不必遽行入秦且入秦之後銀米子藥萬難接濟
各等語想曾國藩必已據實覆陳臣維嶠函古稱天險秦
中徧處榛蕪賊似無可留戀萬一深入與甯州踞回東西
相距二千餘里有劉蓉支柱其間豈能遽合既無從掠食
則終必回竄鮑超軍勢浩大入關後糧運艱難恐生意外
之變仍宜留在豫鄂有曾國荃李鶴年爲籌轉運必可得
力應請